

ORWA WANEEILI WA APWIYA

 Tith'ihu a Wirimu, okathi onrwaahu wa Nyuwo ohiy'ula, mwa Nsina nle noophenteya na Pwiya Yesu, hiyo ninnitthapa vanci-ene okhala wira ninaattamela mahiku ala oowaarya, nisuwelaka wira ola onthoonyerya okathi muulupalex mulaponi. Okathi Mukuttho ole woomalela mwa sothene waavahiyaawa, wira anatampi oohaawa yaarimeenle etaphuliwe ni ekhalane nroromelo ola muulupale hiyo nrinaahu muhina mwa itthirima sahu ohiy'ula, wira nihiku nlo Owo onimoorwa-tho. Nto ohiy'ula, okathi onaattamelaahu epulpitu ila, kivolowaka vamukhora, ni kiiwaka nsipo nla na khalayi, "Ninrowa okhalana esumana yuulupale yo orwa owaani, miyaakha ikonto muloko soopacerya," sinnuupuxerya miyaakha sinci-ene khalayi okathi naathukumann'ahu va mutapernakulu ohinatthi opacerya muhakalaliho muulupale wa mulaponi mothene. Nto, Muluku Tithi, hiyo ninnittimiha miyuupuwelo iyo paahi.

² Ni vookhala ntoko yooreera mmunepani mwahu otthika-tho ohiy'ula wira nipacerye mukina wa mihakalaliho iye sa enamuna ya khalayi vaavo anatampi anvekelaaya wira emoreliwe ikhlarari, ni vaavo namathikela ottuli onikhalihaawe-tho itthu oratteene ni Muluku. Ni Erooho Yoowaarya enikhalaaya Mutthu muulupalex vamuthukumanoni, Yeeyo enkuxa muteko ni enruma, ni enniruuhehela Yolya y'Ekumi mwa Masu. Nto hiyo ninvekela wira Eyo enirumeele ohiyu p'uhiyu mwa muhakalaliho ola, yaavonihe aretta n'ale oothoiwa, emureerihe khula mulipa-oowaamini, ni ephwanye ovuwa onkhuma mwa ikuru iya hiyo ninhelelaahu. Maana, Muluku Tithi, eyo ti ya nttittimiho ni ovuwa paahi wa Nsina Nawe nivekenly'ahu. Amen.

³ Ela eri wira kimmeliherye natiri miyo kaamuhimmy'aka miyaakha muloko ni mmosa sivinre. Okathi munci-ene kiphavelaka wira eyo, masi otthikela otapernakulu mwaha wa muhakalaliho. Nto, vano, hiyo noosuwela wira etapernakulu ahu yaamukhaani kheniphiyerya nipuro na muhakalaliho, masi ninrowa ophunyana muumu, ni vooreeraxa sinwery'ahu, wa ohiyu vakhani onttharelana, wa ovuwa wa Muluku.

⁴ Ni okisivela okhalana muthukumano mukereja. Mapuro manci-ene, hiyo nookhala istaatiyu iye, vanlakani, ni mwaareenani, masi yookhala etthu yoovirikana mwakhalanaru mukereja. Enkhala wira ti yoosivaxa, opatthana wa vakhiviruxa okathi munkhalaanyu mukereja. Muhina mwa areena ale, mapuro a molumwenkuni, hiyo ninnixukhuru mwaha wa oreeriwa w'okhala iwe, masi enikhala ntoko wira mumphwanya ohaaxiwa, ntoko ikuru sa xetwani, murinaanyu opwanyula

muhakalaliho hata ohinatthi opacerya. Vano nto mwakela mukereja, nlo ti nipuro Muluku onkhalaawe-vo, onkhala orwa mpa Mwawe wira nikhalane muthukumano.

⁵ Nto vano ninnitteeliwa murima ohiy'ula woona ithoni sinciene sa khalayi koonaly'aka miyaakha sivinre woomalelani wa muteko aka va otapernakulu. Omoona Munna Graham muumu, ni Munna Curtis, ni Munna Angie muthiyana, ni Munna muthiyana Gertie va, ni Munna Cox ni Munna muthiyana Cox, nto, oh, wulu, anci-ene a nyuwo, Munna Spencer muthiyana ni Munna Spencer, ni othene anyu mu. Hiyo khanreere otteeliwa murima. Amaama, ni Muhano Slaughter, ni munna va, makhuru maalupale paahi a nyuwo, nlelo. Akavi ari mu okhuma okathi opacenry'ahu ottuli, miyo kinihimya okathi okhummyaaka vamuhakalalihoni wira kikhume? Nrowe noone matat'anyu. Mukereja mothene ohiy'ula, nkawehani matata paahi. Ti yooreera saana.

⁶ Vano hiyo nri...noosuwela wira mihakalaliho sinrwa paahi ni Erooho Yoowaarya. Eyo ti Ole onruuha muhakalaliho. Ni hiyo khaninwerya wira mmansihu, hiyo mnoowerya wiilipiha iwo paahi; nto Muluku ohaana oreeriha wiilipiha iwo, ni hiyo ninniroromela wira Owo onooreeriha.

⁷ Kaaleela amwaar'aka mphironi...Nkaakhalanne hata okathi wo olya ohiy'ula. Onkhala waattana muteko. Saari iwoora piili nsana oxekuwa kihinatthi owara ekamisa aka, okhuma okathi waavinnye aka nsana voosiisu. Eyo epantte ya telefooni. Nto naanaano va iwoora piili okathi waarainaaka yookhumelela wa Dr. Sam Adair oLouisville. Nto okathi... Vano nto wiihana wa atelefooni akina anci-ene, ni atokweene. Mmosa a oxipiritaali, aairale, "Ahe, hiyo noolipelela okathi n'ukathi, nto omooroni wakhala wootepaxa naphiyaru wu ovikana ohaawa oryaahu-mo, nilipelelaka." Nto okhuwela paahi ni wunla okhuma mapuro othene, arumeyi imiya sene.

⁸ Nto, miyo kinimooleelani, hiyo ninkhala nimosa wa mahiku maalupalexu olumwenku ula otonko aya osuwela, mmosa wa okathi muulupalexu. Ni miyo kinnitteeliwa murima woona etala mmurimani mw'atthu mwaha wa Muluku voowaatta.

⁹ Vano miyo kookuxa vamurimani vaka, kivekelaka wira okhale otthuna wa Muluku. Nto, p'uhiya wene, aakhala atthu amosa-amosa yeemenle ottuli iwe. Kinniikoha...Hiyo nookhalana o—opuro va, ekhukulu yaamukhaani, kaathuna kisuwele vakhala wira khinaakanle ololahaka ekhukulu ile yaamukhaani. Axithiyana amosa-amosa...wala ethhu, yeemenle ottuli iwe, naakhanlyaaahu khino...Va, kaahiki vakhala wira amosa-amosa va wala ethhu, murwe paahi mukhale vakhakuluni nno, nno oholo. Khino...Munna Ben, hiyo ninnithapa owoonani mu, emaara yookiserya kaawonne-akani kaari Okhatoni w'Osan Fernando, California,

isumana vakhani sivinre. Nto aakhala mapuro osulu nno nyuwo mwatthuna vale orwa, nyuwo—nyuwo mw'atthu ottuli mweemenle. Nto vano nyuwo mwatthuna orwa, vano, murweeke oholo nno. Va nookhala nipuro nihanle vaplataforma va, ni mapuro makina ahanle va, nto anockuxiwa waltaari. Nintthuna wira mukhale ookhurunuwa murima saana sinwery'anyu.

¹⁰ Nto miyo khwaahimeerya amwaar'aka wira kaahiimanela natiri mmansaka wira ni mukhalihero wa Muluku, miyo nkintthuna okhaliha miteko soolekela, kintthuna kilavule minuutu miloko miraru, Apwiya yatthuna vale. Nto eyo enrowa okhala mwiiriirya mwa yeeyo, okhala wira miyo—miyo vekeekhai nkinwerya opacerya voowaakuvaxa. Nto, masi miyo—miyo kihaana wehererya, nto mwaha wa... Vano nto okathi onoorwa hiyo, ola, meelo ohiyu...

Ohiy'ula, mwaha aka t'ula: *Orwa Waneeili Wa Apwiya*.

¹¹ Nto meelo ohiyu ti ohiyu wa ekomunyawu, ni kintthuna kilavule mwaha wa *Ekomunyawu* mwa moonelo wa Waataana wa Khalayi. Nto hiyo... Meelo ohiyu ti ohiyu woophwanela wa ekomunyawu, okhala wira ohiyu Pwiya ahu aalupathhiwaawe. Nto owo ohiyu woophwanela wa ekomunyawu. Nto nuumala miteko meelo ohiyu, muteko woolaleya wa khula nihiku, vano ninookhalana ekomunyawu. Nto atthu othene t'olattuliwa orwa ni hiyo ni—ni wira mpantta wa ethtu ila nlakano nla noovuwa nihieriwaahu ni Pwiya Yesu.

¹² Vano nto ohiyu ontharelana, Apwiya yatthuna vale, okhalaka wira ohiyu wo okhomeliwa, kintthuna ki—kikuxe, mwa moonelo mmosa woovirikana khino wa etthu enrowaanyu wiiwa muraatiyuni, *Okhomeliwa*.

Vano nto Saapatu ohiyu, *Ovithiwa*.

¹³ Ttiminku voosiisu ewoora ya neethanu na mosa, muteko wa ophattuwa wa nsuwa. Iwoora muloko, muteko w'opatiiso, nto yakhalaru ale anrowa opatsiwa. Vano nuumala mutthaka wa Paasikha.

¹⁴ Nto Ttiminku ohiyu, Apwiya yatthuna vale, ninwehererya mutthaka mmosa wookhuveya mwa *Eyoonihero ya Ohihimuwa*, ni muteko wo ovoniha. Miteko soovoniha voolimaleleya ntoko sinkhalanaahu vamuthukumanoni vo—vamuthukumanoni voolimaleleya, Ettiminku ila enrwa ohiyu. Ni vakhala wira khimunatoko woona, ni apatthan'inyu khanatoko woona eyoonihero yoowooneya ya Yesu *ohihimunwe*, kinroromela wira Owo onimwiira ntoko Owo siiralyaawe miyaakha sivinre mmithukumanoni, okhumelela vaava va ni wira itthu imosaru Owo siiraly'awe okathi waary'awe muumu elapo ya vathi. Ni hiyo ninniphavela vanci-ene okathi yoowo, orwa... onoorwa.

¹⁵ Ti yeeyo, murwe nno mwiikhalihe oratteene ntoko sinweryaney'aya. Nto kaatthuna kisuwele vakhala wira khino

meelo ohiyu ninoowerya okuxa ikhatera kamosa-kamosa. Khino ohitto wo—woovithani wala nipuro nlo naakhanlyaaahu ophwanyaka sikina, khino wira nihuluwe ipantte. Ninaatthuna atthu othene saana ntoko sinweryaneyaaya okhala.

¹⁶ Akavi anaaphenta Apwiya ni sothene siri mwa nyuwo? Vano nrowe nikhalih paahi osiveliwa wahu wa Kristu ni niwehe paahi vano. Hiyo khanri va mwaha wa miixuttiho, hiyo nri va wira naakokhorele Apwiya. Ni hiyo nri va wira naalattule atthu othene a khula eyaaminelo, nikhwili, ntoko, eyo khencala va, hiyo ninoorwa paahi wira naakokhorele Apwiya, ni onookhala wiipa wa ewoora emosa ni nuusu wa enamuna ya khalayi nto—nto miteko sihinathhi opacerya. Nto, vano, meelo ohiyu kinrowa wehererya opacerya ntoko ohiy'ula, voolikana, yaweryaneya vale, ewoora ya neethanu neeraru, ni nikhume vowaakuvaxa ntoko sinwery'ahu wira niwerye otthika ohiyu woottharelana.

¹⁷ Nto, vano, atthu othene ekhale oorwa saana. Ni, aletto ahu, nyuwo mwa oorwaaxa saana wira mukele mopatthanani nto muteko omalakaru, nyuwo atthu a okereja va munoorwa va, mphavele ovahana matata n'attu othene ntoko sinweryaanyu. Mukhale paahi... Mmoroxe iwalelo paahi vano, nto mukhalane okathi wooreeraxa. Ni nyuwo khamusuwenle etthu Apwiya ahu akhanlyaya wiiraka, ola okathi wa Paasikha ni hiyo ninniwehererya itthu suulupale.

¹⁸ Vano, mwa Masu ooreerihiwa, kintthuna kisome paahi e—versiikulu emosa, wala eliinya emosa wala piili, mwa Ehapari yooreera ya Luka Oowaarya, nto kapiitulu 15, versiikulu 8:

Nkhi muthiyana xeeni oniira okhalanne iliwura sawe muloko sa eparatha, yamurimeela emosa, ohinapattiha muthuko, ni ohinavela mpaani, khuhiphavela vanci-ene mpakha owo ophwanya eyo?

Nto okathi omphwanyaawe, owo onniwiihana apatthani awe ni anamwaattamanani awe vamosa, wira, Mutteeliweke murima ni miyo; okhala wira koophwanya eliivura yaakirimeenle.

¹⁹ Vano, eyo pooti okhala ntoko Yoolempwa emosa yootikiniha wa Orwa Waneeili wa Kristu, ni...masi enlavula mwaha wa Orwa Waneeili wa Kristu. Ni mwah'ola muulupale orinaahu va oholo wahu vano mmosa wa myaha sa ekumi saana mwa Soolempwa Soowaarya sothene. Khiivo hat'etthu yuulupalex ntoko Orwa wa Pwiya Yesu. Maana vakhala wira Owo khonrwa, hiyo noophwanyiwa ntoko anamoona owootha, alipaoikhwa ahu ari mmahiye t'opweteya, ni kхиwaavo nrromelo onihalenle vakhala wira Yesu khonrwa voovooneya emaara yaneeili. Nto mwa e... waarya nno, moowaaryani wene wa Orwa Waneeili, waari muulupalex, wira esumana ela yoowaarya hiyo ninaattamelaahu vano, wira Yesu, okathi Owo waattamelaawe emaara yoopacerya mmuuttutthini mwene mwa Mwiikimanyo,

Owo aalavula vakhani wa okhwa Wawe, ovithiya, ni ohihimuwa. Owo aalavulaxa mwaha wa Orwa Wawe Waneeili ovikana Owo siiraly'awe wa okhwa Wawe, ovithiya, ni ohihimuwa. Tivo mwa wooneya wa yeela, ohaana okhala mwaha muulupalex.

²⁰ Mwa Waataana Wa Khalayi, sookhalaxa Soolempwa imaara sinci-ene mwa Waataana wa Khalayi sinihimya Orwa Waneeili wa Kristu ovikana saary'aya sa Orwa woopacerya wa Kristu. Sothene wa nloko n'atthu, vano vamanly'aya opakiwa ettipiheryo, enlipa voottittimiha wa Orwa Waneeili w'Apwiya.

²¹ Vano, hiyo nookhalana itiini soovirikana, ni nookhalana mawoko oovirikana ni ateyoloxiiya oovirikana, masi etiini ahu y'oKristu enlipiheriwa voottittimiha, vasulu va okhwa, ovithiya, ni ohihimuwa, ni Orwa Waneeili wa Apwiya. Oh, owo mwaha muulupale. Nto okathi onaattamelaahu vano, mwa miyuupuwelo saka sa xariya saana, hiyo ninkhala mmiyuuttutthini mwa Orwa Waya Waneeili. Vo, mwa enamuna aka yo woona ni waarya wa Soolempwa, khuuvu hata nroromeloohanle wa Ekereja ohikhanel Orwa Waneeili wa Apwiya. Olumwenku mwa mukhalelo aya wootepanyeya woohureya orookhuma moweettiheryani, wa khula mutthenkeso woopakiwa ni mutthu molumwenkuni. Mamwene khanwerya waavarelela-tho atthu aya, hata anamalamula khanwerya-tho waavarelela atthu aya, otaphuwa wa atthu khonwerya-tho waavarelela atthu aya, ni khokhanle hata nroromeloohanle woohikhala Orwa Waneeili wa Pwiya Yesu.

²² Nto ola vano mmosa wa okathi wootepeaxa woopiha wa mulipa-oohaamini ni natampi, owo otonko awe okhalela onamoona, okhala wira okathi wa ehukhumu ori vakhiviru. Ni okathi wooreerihaxiwa wa mulipa-oowaamini, okhala wira ovuluxiwa wawe ori vakhiviru. Sookhala itharelo piili mulaponi ohiy'ula, mulipa-oowaamini ni oohaamini. Ole Apwiya aanrwaaya wira emwaakhele, ni ole Apwiya anrwaaya omuhukhumu. Orwa Waya, onrowa omureeriha mmosa ni omutakhaliha mukina, w'orwaani Waya.

²³ Nto okhalaka wira ela ethu y'ekumi, miyo kinoona wira ehinathhi...wookhuveelani, kiireke, wa muhakalalih ahu mwaamukhaani, wira naahaana oweha voottittimiha-vo, ni mwa Soolempwa, ni woona moota nry'ahu vakhiviru. Kaatthunne-ru osuwela wira waari okathi xeeni, miyo kaanweha eroroco aka. Kaatthunne-ru osuwela nihiku xeeni na esumana ninkhal'ahu, wala mweeri wa mwaakha, miyo kaanweha ekalentaariyu. Ni katthuna-ru osuwela okathi onikhuveela wa yookhumelela ela yuulupale, miyo kinweha Masu a Muluku, Awo annihimya okathi eyo enikhalaaya vakhiviru. Maana Bibilia ohimmye wira, "Ithu iya sapacerya-ru wiiraneya, nvenxe muru anyu, ovuluxiwa wanyu ori vakhiviru." Okathi ori vakhiviru.

²⁴ Eyo yaari ethu emosa yuulupale wa Yohani, mulipa-

owuupulula, Okisironi y'oPatimu, wira okathi woonaly'awe wooniheriwa wa Orwa wa Apwiya. Okathi woonalyaawe otakhaliha waakhala mwa mulipa-oohaamini, ni iparakha saakhala mwa mulipa-oowaamini, owo aahikhuwela, "Nnakhala vo, murwe, Pwiya Yesu!" Eyo yaahihakalaliha murim'awe nuumala sothene soonalyaaawe, sookhumelela ohinatthi Orwa Waya, owo aahikhuwela, "Nnakhala vo, murwe, Pwiya Yesu!" Nto waavinre-aya okathi wothene wa ekereja oonaka, ni voonalyaaawe itthu sothene vaalupale, enamuna saarow'aya wiiraneya, nto okhuwela, "Murwe, Pwiya Yesu!" Ehaana okhala ethu yoovuwa wira Orwa w'Apwiya onnikhuveela.

²⁵ Yesu, okathi awiixutti Awe yaaphiyenrye-aya nipuro awo yaaweh'aya ya mw'erutthuni wala itthu s'erutthu sa vathi. Vano, va nintthuna neemele miniuu vakhani paahi. Kherina kweekwe okhalaka sa mw'erutthuni sinrowa onihuluxa, imaara sikina itthu s'ephattu paahi sinninhuluxa. Arumeyi a Yesu, wala awiixutti Awe, yaamuthoonyerya Owo empa mookokhorela ya mpooma, Yerusalem, empa mookokhorela yuulupale memmo Muluku mwa Ovuwa Wawe wa Shekinah aakkumelenlyaawe mwa Oowaaryaxa. Nto okathi amuhimenry'a Owo moota maluku yaaheliwaaya vooratta-vo, moota osuwela wuulupale wa Muluku aatthokihenry'awe wira maluku ala yaathikiliwe mapuro manci-ene mulaponi khurwa vamosa. Ni mwa miyaakha miloko mixexe s'otekiwa waya, kхиwaakhanle hata onyakula wa sarothi wala oruma wa enyutto. Yaaheliwe vamosa vooratta-vo saana. Ni moota Muluku aarwiyyaawe vasulu va Makerupi ni khooniherya Ovuwa Wawe wa Shekinah, ni moota awo yaarin'aya nroromelo muulupale mukereja mu yuulupale.

²⁶ Nto Yesu khwaahimeerya, "Khamunoona tthu iya sothene." Nnaamwi naari nipuro noowaarya, naari nipuro nooreera. Naari nipuro, empa y'okhala y'Apwiya. Masi Yesu khwira, "Muhooneke itthu iya. Miyo kookhalana ethu yo wooleelani ekhanle yuulupalex ovikana ela. Maana onimoorwa okathi," Owo khwira, "nihinrowaaya okhala hata nluku nimosa vasulu va nikhsaaya."

²⁷ Khivancala moota xeeni nineerery'ahu omukhapelela mutthu ahu a erutthu, moota xeeni niniilipihaahu ovara muteko wa mutthenkeso ahu, moota xeeni niniilipihaahu ovara muteko mukereja mwaha wa sawihu—sooruma sahu sa ekereja, onimoorwa okathi itthu iyo sothene sinrowaaya olakaseya ni ovira.

Yesu khupacerya waahimeerya yeeyo, nto awo khwira, "Exeeni enrowa okhala ethoonyeryo ya orwa wa emalelo ya olumwenku?"

²⁸ Nto Yesu khupacerya olavula ni yaawo, "Onoophiya okathi nihinrowaaya ohala nluku vasulu va nikhsaaya. Nyuwo

munimwiiwa olavuliwa ikhotto ni oruma wa ikhotto, iretta, itetere s'elapo mapuro manci-ene."

²⁹ Nto nihiku nlo, oCalifornia, Oakland wu, waaryaaaya mureerelo ahu okhala wu vamuthukumanoni, ni yaari emaara yoopacerya amwaar'aka yaatonko aya okhala mutetereni y'elapo. Miyo kaakilaanthe mummetthiwa-maihi, ni miyo... esaala khuttikinyeya vakhani paahi. Ni raatiyu naanaanoru khuhimya, "Etetere y'elapo yaamwiiraneya." Khwira, "Enniwehereriwa ekina muhina mwa minuutu mithanu na miraru."

Nto miyo kuupuwela, "Oh, ankhi ela yakhala yookiserya!"

³⁰ Miyo kahaakuva okhuma mummetthiwa-maihi, khwaaphwanya amwaar'aka yaalipelela mphironi, khuvolowa nfaramaaasiya yaamukhaani wira nathume ikartaawu saamukhaani sa ilatarato wira naaveleelihereye oophentiwa ahu. Nto okathi waary'ahu vaavale, mmosa wa miyonelo sa mwiiriiryaa sootikinihaxa, wootheiha mutthu aakhanly'awe woonaka, elapo ya vathi yothene yaaroopacerya othukumela. Isuupha khupacerya omora mwaarumari, ixamaniya khupacerya omora mmampaani, ni imorelaka mphironi, ophirikeya, atthu akhuwelaka ni yinlaka okathi mattakha yaamoraaya okhuma muxirini. Ni ipa suulupale sa iwelelo miloko miraru wala miloko mixexe, saamuthukumela vamosa mpakha mwiixi wala ntthupi naakhuma mwaalukamasani naarowaaya osulu ntoko oviilu muulupale. Nto atthu khupacerya okhuwelaa ni otthimaka. Miyo khwira, "Ele ekatha ya Muluku Oowerya sothene, kiiraka, 'Yoolempwa eri vaxirini.'"

³¹ Yesu ohimmye wira, "Mwaaiwaka ohimmwa itetere s'elapo mapuro manci-ene." Elapo yaahikawanyeya khutthukuwa muramphani ephiro yoorakama, voophiyaka meeturu ni nuusu, khurowa vathi va imeeturu imiya sene mutthayani. Nipuro nimosa, rampha othene muulupale khupwina. Nto miyo kaahuupuwela vaakawenyeiyaaya, kaawerya paahi woona ekatha ya Muluku Oowerya sothene, airaka, "Ni sinookhala itetere s'elapo mapuro manci-ene."

³² Nihiku nikeleraka ohoolo, itetere s'elapo thanu na tthaaru soovirikana saahittikinya epooma ele. Nto mampa a saravexa yaahanle ethhukuliwe, ni anamuhapaliwa yuukelananse mphironi. Ni athiyana yeettasaka mphironi, yiwiarihanse-ene nuusu, ni itthu sothene ntoko wira kхиyaakhumelenle eththu. Atthu t'okhalaxa a elapo ya vathi olelo mpakha vahinsuwelaaka exenei enrowa otthuneya wira ettikinye elapo ela. Awo anikhala ntoko ooicaliwa. Awo khanweha. Ni mulopwana mmosa hata aahihimya moonelo, ntoko saamwiiwalyaaka ni niitho naka, khwira, "Muhoona eththu kiiraly'aka? Miyo koovura esooko aka. Miyo ka mutthu a ikuru."

Nto miyo kuupuwela, "Ooveeha xeeni!"

³³ Nkinatoko wuupuwelaxa yeele okhala oveeha ntoko siiralyaaka wenne nno opooma wahu, okathi kaamuttharaaka rampha muulupale nsana ohiyu orowa oGergetown, okhala wira muntupha ikawanyeyelo nno vakhani muhinaththi omphwanya rampha muulupale musya murwaaka. Naahikhala nipawe nuulupale naapharihiwe vale, nto naahimya wira, “Owo oohihimuwa, ookhalana Ekumi.” Nto nipawe naatharelana, awo maili paahi, yaahimya wira, “Vari saravexa Budweiser, vaakhala ekumi.”

³⁴ Miyo kuupuwela, “Oveeha xeeni!” Ti yeeyo tu ekhanle wa yeeyo. Ni Bibilia ohimmye wira, “Ohinatthi Orwa Waneeili wa Kristu, wira atthu yaarowa okhala anamaveeha, yeettelaka ithaama saya soonanara, oohaataaniheya ni owoootherya akhwaaya.” Moota olumwenku okhanlyaya moowootothiwani mmo!

³⁵ oBombayimi, oHintiya, naanaano okathi Billy (mmiravo aka) ni miyo naaryaahu wuuwu vamuthukumanoni muulupale weiwo atthu ikonto miloko sene aHintu yaavaherenryaaya ekumi aya wa Kristu, waahirwa olopolo wuulupale. Ni kintthuna wira nwehe osuwela wa ephattu. Nto, naanaanoru, mwa mwaha mmosa woohisuweiwa, axipalame othene axikhaani mpooma khupacerya okhuma orowa okuluttuni. Nto axipalame, mwa makoto, yaahikhuma orowa okuluttuni. Ni awo khupacerya oweha inama sothene ni ipwittipwithi ni inyompe. Masi oHintiya, mikuso saya khasihiyo ntoko mikuso sahu, khasihiyo mikuso sa mattoro, iyo mikuso sa miyala suulupale sintekeliwa osulu. Nto inama sothene khupacerya okhuma mmakokoroni n'ukhumela ota wa ipa, ni orowa ottaiwene eriyari ya ematta ni opacerya orukurerya eriyari ya mmatta. Vano, naanaanoru, etetere y'elapo yuulupale khumana ni khuttiikinya makokoro, miri, miyala, ipholovolo saanvava. Nto axipalame khiyahokolowanse, ni inama saakhala ota mmatta, vano mutthu naanaanoru khukelela oholoo uupuwelaka wira sothene saari saana. Nto mmeelonni mwaya, etetere ekina khuruma, ni ipa sinci-ene khupiluwa ni ipholovolo khuvava. Ni mmurotonni mwaya, inama khutthikela mmakokoroni ni axipalame khutthikela opooma.

³⁶ Oh, Ole onlyha ephera, Ole aaruuhale soopattuxa Sawe sikhaani mukalawani, nlelo mukumi ni onniruma. Nto iyo sinkhala ntoko osuwelaxa sa Muluku onvikana mutthu, ole Owo ompattunx'awe ailattanihaka Yoowo; okathi, mutthu oniveehaaawe. Soopattuxiwa sikhaani sa elapo ya vathi, Muluku onnivaherya ni iyo saahikhalaena enamuna aya y'okhuma mmakokoroni maalupale. Saamwiira siiviwe-ene, axipalame yaamwiira enyaanyiwe mminyattani sa miyala okathi saattikinyeyaaya nno ni iwe.

³⁷ Ithoonyeryo sa Orwa Wawe! Oh, nla nihiku nuulupale ninkhal'ahu vano. Itetere s'elapo mapuro manci-ene, iretta, ithu

iyo sothene Yesu sihimalyaawe siri vaava. Wa enamuna aka yo woona, miyo nkinoona etthu enihala woohikhala Orwa wa Apwiya. Eyo eri vakhiviru.

³⁸ Yesu mwa e...nave-tho wa olavula Wawe w'atthu Awe, Owo iirale, "Musuweleke nlikanyiho na mwiri wa efiiku. Okathi ompaceryaaya ovaruwa ni ophuwela makukhu, muniira elimwe ehaattamela. Nto moonakaru itthu iya opacerya okhumelela, musuweleke wira okathi ori vakhiviru."

³⁹ Nwehe ele yaari mwiri wa efiiku. Mwiri wa efiiku kweekwe ninkhalaka nloko n'aYuta. Owo khohimmye paahi "mwiri wa efiiku," masi "miri mikina." "Moonakaru mwiri wa efiiku ni miri sothene sikina siphuwaka makukhu aya." Vano, Owo khaalavunle mwiri wa efiiku paahi, masi miri *mikina*.

⁴⁰ Vano, nrowe niwehe paahi okathi omphuwaaya makukhu aya. Hiyo ninnikhala okathi mmosa w'omeekha mwa miyaakha vakhani sivinre. Ekereja y'Amalapo yaahikhalana mmosa wa mihakalaliho suulupalex etonko aya okhalana okhuma vaavo...okhuma mahiku a arummwa; oh, ni ekereja y'Amalapo khiyaarina muhakalaliho okathi uwo, yaari ekereja y'aYuta yaarina muhakalaliho. Masi ekereja y'Amalapo, mwa miyaakha muloko wala muloko ni miili sivinre, yookhalana muhakalaliho muulupalex wa okathi wothene.

⁴¹ Hiyo ninnupuwela muhakalaliho wa Martinho Lutero, ayo, mulopwana, waari muulupale, masi waari w'Alemaanya paahi. Hiyo ninuupuwela muhakalaliho wa Wesley waari oInkatera, owo khumwareela wенно, ni Ikisiro vakhani Pritaanika, masi kхиwaaruuhale ephwanyeryo yinci-ene. Masi olelo, muhakalaliho ola oniiraneya, wa Erimu, woophiyerya mara okhuma ephareya mpakha ephareya voohi-mukaano, olumwenku wothene, ovira muraatiyuni muulupale, ni erekista ni anamalaleya ehapari amwareiye, oohikhaliheriwa n'atthu, ni wooruuha muhakalaliho imaara ikonto miloko vaara ikonto sene (sa minepa) siyariwaaya Momweneni mwa Muluku.

⁴² Mwa muteko aka yoomi wookhaaseya Apwiya akivahaly'aya, kinnoonaka saana minepa soovikana emilyawu orwa Momweneni mwa Muluku. Nkuupuwelani yeeyo! Okathi akina ni miteko iya suulupale, sinviraaya muraatiyuni, ni sikina, wa imilyawu. Wookhala mooro wa muhakalaliho onivarela mwa khula mwaako mulaponi, voowiireya, okhuma okathi miyo... okhuma miyaakha soophiyaka muloko sivinre, okhuma okathi miyo...hiyo nipacenryaahu muhakalaliho. Hiyo nri okathi wookiserya.

⁴³ vano nwehe, nto, okathi vakhani ehinathhi iyo, Owo oolaleerya va, khwira, "Makokoro a oYerusalemanoonyaanyeliwa vathi n'Amalapo mpakha okathi w'Amalapo omala." Amaka t'akunxe. Hiyo ninnisuwela eyo. Ni kintthuna wira nwehe ethowelo ohiy'ula, moota Iximayeli ni Isakhi

nlelo avarananse-aya muxikoni mwa mmosa ni mukhwaawe, oYerusalemu wene weiwo ohimmwe khalayi wira yaamukhalasa. Nto miyaakha vakhani sivinre yaari yoorika aYuta okhala oYerusalemu.

⁴⁴ Vano, Yesu alavulaka, “Moonakaru mwiri wa efiiku ophuwa makukhu aya.” Vano, aYuta aamwaraxeliwa mulaponi mothene, mammelu maalupale, imilyawu wAlemaanya, ni wItalia, ni Estadu Unidu, ni olumwenku wothene. Ni Muluku, ntoko Owo siiraly’awe mahiku a khalayi, aalipihalyaaawe murima wa Farawo, Owo oolipiha murima wa Mussolini mwaha w’aYuta, ni aYuta ahoodoliwa wItalia. Owo aahilipiha murima wa Hitler, vano awo khoomoliwa wAlemaanya. Owo aahilipiha murima wa Stalin, vano awo khoomoliwa oRussiya.

⁴⁵ Ni nyuwo munniweha epaphelo ya ihapari, wira hiyo, Estadu Unidu, ninkhala epantte n’atthu a wArapiya? Oh, munna, yoolempwa eri vaxirini! Muluku ohimmye wira, “Ole onrowa omureeriha Isarayeli onooreerihiwa, ole onrowa omutakhaliha Isarayeli onootakhalihiwa.”

⁴⁶ Vano, kookhalana elatarato emosa owaani, ahiiso kookupali wira erimooliwa okathi ula, eniihaniwa ni anasiyensiya, *Minuutu Miraru Ohinatthi Ohiyu eriyari*. Vakhala wira olumwenku wa siyensiya woohimya wira “eroroco yoorkurerya mpakha siryaaya minuutu miraru ohinatthi ohiyu eriyari,” ni kinoona wira awo aavukula eyo vano mpakha minuutu mmosa ohinatthi ohiyu eriyari, okathi attemulelanse-aya hitroxeeniyu wala okisixeeniyu, ya aatomu, ni ikuru iyo sothene suulupale awo yaawery’aya ottottela mureerelo, yaamuwerya oruuhelelha omalamaliha voomalela muhina mwa okathi wa minuutu mithanu. Awo yaamuwerya, mara ohiy’ula, ohikhala hata mutthu mukumi Onkela epheyo wothene wa elapo ya wAmerika mwa minuutu miloko miraru. Ni emphwanyaneya mmatatani mwene mwa nikhuru n’alipa-oohaamini anninyokha. Ni, ohiya vo, hiyo nihaana ipatela ni apaketi sookhalihwi, ooheliwa mapuro othene, mothene...oSiberiya, oHunkriya, ni mapuro ooziyana-hiyana, weiwo apaketi ahu amphwanyaneyaaya, oopakhireliwa muthinto mmosaru sa ipholovolo.

⁴⁷ Axinna, vahooxa sihinupuwelel’anyu! Sotoma ni Komora yaasuvela vakhani, ohiy’ule, wira awo yaakhala ewoora aya yookiserya. Ejitu aasuwela vakhani wira nlaikha na moekhwaani, naahimmwe wira naanirwa, naarowa orwa ohiyu yoole. Pearl Harbor mwaamukhaani aasuwelenle vakhani otupheliwa iwe waairaneiye. Hiyo noophimmwa vapalansani noophwanyiwa nihalaka! Nookhuveela okathi wookiserya!

⁴⁸ Eexeeni yaarowa okhumelela vaakhanle wira...? Awo, oMoskoovu, yaaniwerya weettiherya ipholovolo iye, sineettihiwa ni ittheneeri ni ekaruma yoohottela musulu, yaamuwerya omoroxela oratta-ene ekapwitthi ile Ephiro Yaneexexe

oLouisville awo yaatthunanse-ru. Ti yeeyo. Ni ninoowerya weemela iwe mphareya nipo nlo, mpaketini mwahu, ni oroihela olukama epooma yuulupale ya oMoskoovu natthuna vale. Exeeni yaarowa okhumelela, munn'aka, vaakhanle wira orukunuwa wa epholovolo ele yuulupale waamwiiraneya nto elapo ela yaamwaakhela ettikinyeyelo, ewoora yeeyo hiyo naarowaahu otaphula itthu imosaru nittikinye epantte ekina? Nto hiyo ninkhala vaniwowoni, naamukhaani, nikhaanixa, nooyeva, noopeepheya khula enamuna, okathi itetere s'elapo sikhuuralyaaya khukhuura mpakha nikhanlyaaya ntoko oyeehi nooce. Eyo yaaphuleiye vaalupale vamosa nto elaava ela ya etikanelo ya imiliya ikonto thanu na tthaaru yaamuyeehereya osulu, yaarowa wira voolikana ele Muluku ohimmyaawe wira yaamwiiraneya.

⁴⁹ Hiyo nri okathi wookiserya, hiyo nri va. Khiivo enamuna y'oweemexa. Oveka wothene... Hiyo pooti omuhela Eisenhower mwa khula elapo, ni khenrowa hata weemexa. Yesu Kristu ohimmye wira okathi ula waamoorwa, hiyo nri va. Mwiri wa efiiku ophuwaka makukhu aya.

⁵⁰ Valataratoni va, wIraani wu, nyuwo moosoma murevistani *Look*, moola awo yaakunxaaya matteeke maalupale khurowa iwe khwaasariha mmatteekeni aYuta. Ikonto a yaawo, yaarisa iwe okhuma waakuxiwaaya oPapilooniya, yaarisa weiwe mwa miyaakha ikonto piili ni imiya thanu, nto yaahiiwe weiwe. Awo yaalima ni ikaruma saapakiwe ni ithaapwa. Awo khayaasuwela hat'ethu ya Yesu wira aahitoko okhala elapo ya vathi. Awo khayaasuwela hat'ethu ya ethu p'itthu woohikhala elimalelo ya khalayi ya eYuta, ilimalelo yaakhanlyaaya ethtaraka. Nto okathi matteeke ala akhurunwaaya, khupacerya waapakhirelamo aYuta ala, wira yaattikiherye owaani...

⁵¹ Profeta aahilaleerya, miyaakha ikonto piili ni imiya thanu na tthaaru ahiiso ikonto tthaaru saavinre, ni khwira, "Awo yakhumaru w'epothani iwe, Muluku onimwaaruuhu vamapuphani a axawawe." Profeta aahoona ntteeke nirwaaka, owo aahoona awo akhuruwaka, ni yaakuxaka ni yaattikiheryaka owaani. Owo khaasuwela etthu yo wiihana eyo, owo paahi... Yaakhala ntoko xawawe wa owo, tivo owo khwira, "Awo yaarowa ottikihiwa vamapuphani a axawawe."

⁵² Vano awo vakhumanse-aya mmutteekeni, ni amiravo yaakkaliherya atokweene, awo yaanvaanelaniwa. Nto awo khwira, "Nyuwo mutthikenle owaani wira mukhwe?"

Awo khwira, "Nnari. Hiyo nitthinke wira nimoone Mesiya!"

⁵³ Oh, apaketi aalupale ookhuma mulaponi mothene, miyaakha vakhani sookiserya, aatthuwa mwixi erowaka oYerusalem ni aYuta atokweene, amiravo ni atokweene, ewaranse-ene ikuwo saya, ekhumaka onkhuma nsuwa, ekhumaka onkela nsuwa. Ni evavasaka musulu wa epooma yuulupale ya oYerusalem eri

eveveleyaka etheneeri ile ya khalayi ya ipantte thanu mmosa ya Davidi, epantera ya khalayixa molumwenkuni, ehivanve mwa miyaakha ikonto piili ni imiya thanu, enihimmwa okhala nloko ohiy'ula. Mwiri wa efiiku oniphuwa makukhu aya.

Yerusalemu onimunnuwa, Apwiya
 anoomureherya,
Ithoonyero maprofeta yaahimmyaaya;
Mahiku a Amalapo t'owaalakeya, oosareya
 woova;
“Mutthikele, yawinyu, O oomwaramwareya.”
Tthiri nihiku noovuluxiwa nri vakhiviru,
Mirima s'atthu sinooxanka mwaha wo woova;
Musarihiwe ni Erooho ya Muluku, mithuko
 sanyu soolikana ni soowooneela,
Nwehe osulu! Ovuluxiwa wanyu ori vakhiviru.

⁵⁴ Vahooxa ovikana sinuupuwel'ahu. Hiyo khaninrwa okereja wira nikuxe ekhukulu, hiyo khaninrwa okereja wira niwe elaleeryo yooreera, wala orwa okereja wira niwe nsipo nooreera. Sothene iyo sookhalana nipuro naya, masi vanreerelaaya hiyo orwa okereja wira wiiwehaweha ni Muluku ni woopowa wa munepa ahu, okhala wira Nihiku noovuluxiwa nri vakhiviru.

⁵⁵ Yesu Kristu, Mwaana a Muluku, olikanyinhe ela (Owo oohimya) ni muthiyana. Ni muhina mwa mwah'ahu ohiy'ula, ninnimphwanya muthiyan'ola, aiy'awe yaaronwe, ni owo yaahimpweteya emosa wa ilivura sa nleha nawe. Vano kinoophavela oleeliherya yeeyo.

⁵⁶ Olelo, muthiyana atheliwa vale, owo aahaana owara epeetthe ya otheliwa ntoko ekanyeryo wira t'otheliwa. Eyo eri wira emukhoottiheryeke mulopwana mukina okhalana nnaata n'uwo. Awo anooweha ni woona wira muthiyana ootheliwa.

⁵⁷ Mahiku ale, awo khayaarina ipeetthe sa othelana, awo yaakhalana nleha (awo yihana “nleha”) awo yaahela mmuruni mwaya. Naakhalana ilivura muloko, ni saarukurerya mmuruni mwaya. Nto eyo yaari ekanyeryo wira yaari athiyana ootheliwa, ni khaavo hata mulopwana aari wira aarukuneleke, hata amiravo yaarina otthunanaka n'awo. Awo yaari ootheliwa.

⁵⁸ Khula emosa wa ilivura iye... Nakhalanaru okathi paahi (masi nkirina, kinrowa ophavela okhaliha moolomo aka ookhuvexxa ntoko sinweryaneyaaya), kaamuwerya woohimeeryani etthu khula emosa wa ilivura iye saahimy'aya. Yaaheliwa mme, ni khula eliivura yaahimya nneema khata na muthiyana. Yoopacerya, yaahimya waaphenta wawe aiy'awe. Yaneeili, natiri awe a nneema na okhala ooloka wa yaawo. Nto yaneereru ni yaneexexe ni yaneethanu erowaka mpakha ya neethanu na xexe ni yanamuloko.

⁵⁹ Mwatthuna vale oweha, nwehe aKalasiya 5. Munosuwela wira muthiyan'owo aathoonyerya Ekereja, ni Ekereja Muthiyana

oowaakameliwa wa Kristu. Ni nleha Ekereja entthuneya wira ewareke nimphwanyaneya mwa aKalasiya 5, nenlo nikhanle ophenta, ohakalala, murettele, ovilela, oreera murima, wiisumaaliha, ohiviruwa pure, ovilela. Nlo ti nleha nintthuneya owariwa Mukereja, ophentana w'axinna, oreerelana murima w'axinna, opatthana.

Nto muthiyan'ola, okathi... Siiso wiirale ovinre-ene okathi ntoko wiilale owo aasuwenlyaawe wira yaahimpweteya emosa wa ilivura iye.

⁶⁰ Oh, vakhala wira waahinto okhala okathi ekereja erinaaya wira mwaalikelo wira esuwele vakhala wira mothalana ilivura sothene vaavo, waahaana okhala vano. Woopacerya wiila. I-itutuxeryo sene ni meeku oohonona esilimwelo siithomeiye vasulu va elapo, etampi ni enamuttompe mapuro othene. Hiyo ninkhala okathi woooopiha, okathi okhanlyaaaya otakhala, atthu anrowa okereja vooothethererya paahi, atthu anrowa okereja wira ephavele wiisiipithiha otakhala waya murima, atthu anrowa okereja n'uhimya oKristu n'ukhala ntoko atthu akina a molumwenkuni, awuryaka, onvura sikaro, omweetta cuuku; athiyana anwara voohifayi, ewaraka ikuwo yahaakhanlyaaaya owaraka o—okatthi waya wo wiiwariha, n'ukhumela ota ohoolo v'atthuni. Ni ophentana w'axinna ethu emosa enihalela, ovira. Hiyo khamirimeeliwe eliivura *emosa*, masi, vekeekhai noorimeeliwa *khula* emosa wa seijo.

⁶¹ Ni waahipacerya wiila, ni, muupuwele, aiy'awe yaamutthika. Nto awo yaamphwannye-ru ni emosa wa ilivura iyo ehikhanle, yooniherya wira owo aahitthittiwa nlepa "namuttompe."

⁶² Ni owo aatharimunle, ahiiso, aainanarinhe-ru mwa khula enamuna ni khooniwa n'atthu, aamuruuhawa ohoolo wa namukuttho ni oruuhiwa anamoona wira owo aahiphwanyiwa siiso, nto namukuttho amoona-ru wira owo aari muthiyana ootheliwa, aakumiha eliivura (vanlehani vawe) ele owo aapakann'awe yoonanara. Vakhala wira aahi—aahihonona nneema nawe, awo yaakumiha yeeyo. Vakhala wira aahikhala asivelanaka, ooniheryaka wira khaari ororomeleya wa aiy'awe, yaakumihiwa yeeyo. Etthu p'itthu, awo yaamukumiha. Nto okathi aiy'awe yaatthikaaya, awo yaaphwanya wira aahitthittiwa nlepa, nto awo yaamummwalana naanaanoru ni ohikhala nnaata ni muthiyan'owo. Awo khiyaamutthuna muthiyana siiso.

Tivo waaira okhuveelaka wiila okathi owo aasuwenlyaawe wira yaahimurimeela ethu, okathi w'aiy'awe orwa, ni waahipacerya wiila.

⁶³ Ekereja enreerela yiwehawehake ni Masu a Muluku, oloka wahu, ororomeleya wahu, wiivaha wahu. Hiyo ninookhala anamakwakwaruwa mwaano, alipa-oowaapa,

anammuvura sikaro, anafithina, maYesapeli oowiipintari, sothene mukalentaariyuni iye olumwenku wothene siniiraaya, ekereja y'oKristu eniitakaiha mwa itthu seiyo olelo mpakha vanrikaaya onvirikanyiha mmosa ni mukhwaawe. Ola okathi wa hiyo wiiwehaweha. Vanimwiila.

⁶⁴ Vano, wira...vaahiila saana mpakha waardinawae opattiha muthuko. Vano owo khukuxa muthuko. Kahi wira aakunxe muthuko paahi, masi aahikuxa nvelo khupacerya otatha empa.

⁶⁵ Oh, munna! Vakhala wira waahinto okhala otthunaneya wa okathi wo opattiha muthuko, oveleeliha Muthuko wa Ehapari yooreera, Erooho Yoowaarya ottihikela mukereja... Kahi wa eyuukhuwelo yinci-ene, kahi wa ithiru, kahi wa muteko wa eyuukhuwelo, kahi wa otuphatupha mwaha w'otthapa, masi ethu eniiraneya mmurimani okathi alopwana n'athiyana ankhalalaaya oratta-ene ni Muluku. Ekeekhai. Hiyo nri okathi wookiserya.

⁶⁶ Nto owo aahipattiha muthuko, wira onvahen waarya. Nto, munna, khula muthuko mwaamukhaani mu ohaana opattihiva ohiy'ula. Kahi yeeyo paahi, masi owo aahikuxa nvelo, ni anamwaattamanani yaaniwerya woona nthupi nivavaka. Owo aahikhala okathi w'ekekhai wo otatha empa, maana aiy'awe yaahalela orwa. Nto awo yaamphwannye-ru owo ohirina eliivura ele emosa, owo aari "namararuwa."

⁶⁷ Munna, hiyo Ekereja ya Muluku mukumi, okathi ula muulupale onikhala'ahu vano, ennithuna nithokose, nirowe oholo wa Muluku, nipattihe muthuko wa Masu a Ehapari yooreera, ni niiwehaweha nisuwele vakhala wira khennihaleela ethu, ni vanci-enexa noonaka itthu sothene iya sirwaaka. Hiyo nri okathi wookiserya, Orwa wa Kristu ori vakhiviru. Khokhanle nroromelo mukina mulaponi wa Ekereja.

⁶⁸ Ni, nkawehani, ekereja enooovolola. Ekereja kherinatho muupuwelo. Vannirika waavenyiha. Bibilia ohimmye wira awo yaamurowa ophiyerya mukhalelo yoowo okathi yaarow'aya wira, "Moone, Apwiya ahu annipisa Orwa Waya.' Ni wira anrowa okhala ekhuuranaka ni elumanaka mmosa ni mukhwaawe, ni siiso, ni ewanaka." Vekekhai okathi yoowo. Sothene soolikana. Makukhu aarukunxiwa, ntoko saary'aya siiso, ni ti woolikana, Orwa wa Apwiya.

⁶⁹ Ekereja Luteraana yoopwetexa muthuko aya. Ekereja Metotista yoopwetexa muthuko aya. Ekereja Patista yoopwetexa muthuko aya. Ekereja ya Pentekosite yoopwetexa muthuko aya. Khula muthuko onkhala ntoko woottipha.

⁷⁰ Atthu aPentekosite, atthu a Osantu, aniira voolekana ntoko aMetotista. aMetotista aniira ntoko aPatista. aPatista aniira ntoko aLuteraano. aLuteraano aniira ntoko aKatolika. Nto sothene sitthikenle mwa ethukumanyelo yuulupale ya etampi. Ti yeeyo. Hiyo nri okathi wookiserya, Orwa wa Apwiya.

⁷¹ Vano, owo aahikhala okathi wo otatha empa. Owo aahittikittha vathi, owo aahivela ixiri, owo aahikuruxa matthavi a aranttasi, owo aahithkela mpakha ophwanya ethu yaamurimeenle. Nto, vairaly'awe siiso, owo aahiihana ikereja sihimaawe wira sirwe naanaano.

⁷² Miyo khenikicala vakhala wira nyuwo mwa Mmetotista, muPatista, muPentekosite, Prespiteriyaano, murwe, nitteeliwe murima vamsa. Waphiyaru okathi uwo, ekereja yaphwanyaru ophentana waya w'axinna, ekereja yaphwanyaru ephwaneliwo aya yoowaarya, ekereja yaphwanyaru opuro aya mwa Kristu, eyo enoowihana mamempuru akina a erutthu, "Murwe mutteeliwe murima ni hiyo." Muluku ontthuna wira ekereja emphenteke Yoowo.

⁷³ Kookupali wira waari Ettiminku voosiisu okathi waalavul'aka mwaha wa maneema a muthiyana, moota oryaawe ooreerihiwa, ole aawerya ophwanya ethu yoosivela ovikana orwa owaani ookhulumuwa, okathi Muluku onvahalyaawe mulopwana mwaara. Muthiyana ni mulopwana t'ohivalaaniheya, awo ari mmosaru. Wopattuxani, Muluku aapattunxe oowanli aya vamsa toko, ni awo ari murima mmosa, munepa, muupuwelo, n'itthu sothene. Okathi Owo ompank'awe mulopwana mutthayani w'elapo ya vathi, Owo aahiinvalaaniha n'amwaar'awe. Okathi Owo ompanke-awe Hawa, Owo khaaronwe ompaka mu—muthiyana, okuxa ethaya *ekina*, masi Owo aakunxe epantte ya Atamu niparari khumpaka mwaar'awe. Owo khwira, "Ola nikhuva na nikhuva naka, erutthu ya erutthu aka." Awo yaari mmosa mwa murima, munepa, ni erutthu.

⁷⁴ Eyo ethoonyeryo ya Kristu. Muluku khokunxe Ekereja ya Kristu okumiha mwa eyaaminelo, nnakhala Owo khokuminhe mwa muromolelo. Owo okuminhe vamurimani va Kristu, nivaka mpararini mw'Awe, mwa Ephome.

⁷⁵ Munn'aka mulopwana, muthiyana, nkincala moota xeeni mukhanly'anyu okhalaka natiini, mwaahikhuneeliwe ni Ephome, moopweteya. Ninookela mwa yeeyo, murotto ohiyu, nooniherye moota ekhanly'aya y'ekumi. Masi moopweteya mwaahikhalaane-ru Ephome.

Vano, nto okathi Owo ompanke-awe mwaara owo, owo aari muxirikha. Eyo yaari ethu wira owo aphenteke, waari mpantte wa yoowo.

⁷⁶ Vano nwiriyane oratteene. Mulopwana wala muthiyana khonkhalkhala oweryaka orowa Wirimu vahikhanle wira anooyariwa vasya. Miyo nkinihimya wira okhala wira nyuwo moolavula ilavulelo, miyo nkinihimya wira mwaha wo wira munnikhuwela, nkinihimya wira mwaha wo wira moorowa okereja ni khamucompale, owara ipitawu mwaha wo ororomeleya wanyu;

itthu iyo siri saana, masi kahi Yeeyo. Ohaana okhala ophitaana wo wiiraana mara eriyari ya nyuwo ni Kristu, mpakha okhala mmosaru. Nyuwo mwa mmosa! Nto mwaahikhale, moota...?

⁷⁷ Mwaamuwerya otthokelela orwa ohiyu, ookhulumuwa, owooceya, oolosowa? Mwaari mulimi, mekaaniku, mulaleyi, ethu p'itthu mukhanlyaanyu, mwaarowaka ethoko anyu yaamukhaani, munootthuna mpakha mphiye. Munohula mukhora nto mwaara mwaamukhaani oophenteya oneemela vale, onimookhomasani. Owo ori othene ooreerela ni oothuwa. Owo onimoorwa khoopcarini mmalakuni, owo khwira, "Paapa, mookhulumuwa." Onimookilaathihani vakhaterani, onimoophiteeryani ottuli, onimoopatikhani ni woovaaveryani. Enkhala ntoko wira nto khamukhulumunwe, ethu emosa enimoovenxani. Eyo ethu Muluku oovahenryaaweni yeeyo. Eyo epantte ya nyuwo, vano, owo akhala mwaara eekeekhai.

⁷⁸ Masi ankhi iyano iye saampicanri mulopwana mukina nihiku nenlo wala okathi mukina? Ankhi vakhala wira munnisuwela yeeyo? Ankhi miyoono iye saampatinkhe mulopwana mukina? Owo t'owiitta mara ottuli wanyu. Epeeco eyo empatta ntoko epeeco ya Yuta. Miyoono iyo, mwaamutthuna sahoopatinkheni. Oh, owo pooti okhala othene ooreerela, maihi awe pooti okhala oonyokotowa, maitho awe pooti okhala ooxeerya, malaku awe pooti okhala a nceno, isaaya sawe sikhaani pooti opasariwa, owo pooti okhala ooreera saana, masi ntittimihole w'ekeekhai wooloka wa oreera murima ni ophenta ni nroromelo waahikhale-vo, vaamureerela owo okhale ottaiwene wa ottuli wanyu. Nyuwo khamunthuna okhala nnaata n'uwo, owo ti—owo eteeni wa nyuwo. Nkincala moota xeeni oniikhalihaawe ooreera, owo nlelo t'ovonya mpakha ooniherye okhala oophentiwa, ekeekhai ooloka, ohimpentaka hata mutthu woohikhala nyuwo, ni hata epeeco emosa ya myanoni mwawe woohikhala yawinyu, hata miyoono mikina sinimpatikha soohikhala sawinyu, ni nyuwo munnisuwela. Moonelo xeeni, okurunuxiwa murima xeeni!

⁷⁹ Owo ti iya ni mwaara, ekhanle ethoonyeryo ya Kristu ni Ekereja Awe. Nto mwaarowaka okereja wanyu, siiso mukhalanne ikhukulu sooreeraxa sa mpooma, nyuwo pooti okhalana namukattha oorakamaxa okhanle mpooma, nyuwo pooti okhalana ekaruma ya masipo erina mulithi yooreeraxa, nyuwo pooti owara vooreera, nyuwo pooti wiipa ntoko miryapwe, masi sothene iyo, mwaapecarinaka ni osivelana ni olumwenku, epeeco eyo mmalakuni mwa Kristu epeeco ya Yuta. Owo khontthuna ethu eri nnaata ni nyuwo. Owo onweha epeetthe anyu ya ovarihana w'othelana ni onaphwanya eliivura ekumihewe, Owo omphwanya wira ophenta woomala. Owo mukhalelo, Owo omphwanya wira ororomeleya woomala. Nyuwo mooraruwasa ni olumwenku. Munnirowa moowiinani ni mmeerani mwa boogie-woogie, ni woona iprokrama soonanara

sa khalyi sa mutelevisawuni. Nyuwo munoomuraruwela Kristu, wa Yoowo, mwaamwiihanaka Owo Iy'anyu.

⁸⁰ Bibilia ohimmye wira, "Nyuwo muniira, 'Miyo ka thaaciri, kхиivo enkithowa.'" Masi Owo oirale, "Nyuwo khamunsuwela wira mwa oohiwar'ethu, ootakhaliwa, oohoona, masikhini, masi khamunsuwela." Ola okathi opattinhe -ahu muthuko ni ovela empa. Orwa wa Apwiya ori vakhiviru.

Nrowe nuupuwele yeeyo minuutu vakhani paahi nuuramihaka miru suhu. Munimwiira? Munootthukula epiyaano, munna?

⁸¹ Exeeni munirakaanyu, ekereja? Mikhalelo sanyu ti sivi ohiy'ula? Matata anyu vavennye-aya mwa wiivaha wanyu, yookhala etthu yoothokonseni? Mwaasivelanaka ni olumwenku, mwaairaka itthu iya sikhanle soonanara, epeeco anyu . . .

⁸² Muupuwele yeeyo, mulopwana. Mwenye, kintthuna kookoheni etthu emosa. Nto ela enninrowela Muhano, nave, ni Muhano. Mwaamuthiyana, exeeni mwaarowaanyu omuupuwelela mposi anyu, mwaasuwenleru wira moomoona ota aapecariki ni eettanaka aximwali akina, ni nyuwo nvarianne-ene ni yoowo, vano owo khunarwa woomanani mmataatani, ni wira, "Oophentiwa, miyo kinoophentani nyuwo paahi"?

Nyuwo mwaamwiira, "Nyuwo namirima miili, khumani oholo waka!"

⁸³ Exeeni mwaarowaanyu . . . ? Muupuwele yeeyo, Mwenye. Hiyo khanivarihanne paahi, masi noothelana. Ekereja ethelanne ni Kristu. Hiyo na Mwaara a Kristu, ninaayara aana. Mwaatthuna orwa sayi owaani ohiyu, wo wiivaha wanyu w'amwaar'inyu, ni awo arina nikhuru n'anamwane axikhaani, ni nyuwo munaphwanya nihiku nenlo . . . ? Nto okathi awo ankalaaya, oh, makwarikhwa aya pooti epintariwe (eyo ti wii, nyuwo mwakhala a molumwenkuni). Khino nyuwo . . . Awo khino pooti wooneya okhala ooreera, masi nyuwo munnisuwela. Muupuwele yeeyo, munna, vakhala wira muthiyan'ovo aahikhala aapecariki alopwana akina. Miyoono iyo soopatinkheni, oooleelakani wira onnoophentani, ni nyuwo moosuwela wira eyo e . . . wira owo ohaaphenta akina nave, ophenta wawe kuhiyo w'ekekhai. Ophenta wawe kuhiyo w'ekekhai. Owo kuhiyo wawinyu, ti wa akina nave. Waakhanle-ene olopwana wa nyuwo, mwaammukumiha ottuli wanyu. Muupuwele moonelo xeeni waarowa okhala. Muupuwele yeeyo, muhano, aiy'anyu yarwa vale owaani. Kahi yeeyo paahi, masi eranve-ene iretta sa iyirelo soohureya.

⁸⁴ Nto, oh, oreerihewe murim'anyu, ekereja yoolyiwa ni iretta sa nkuwonni sa erooho, sa inamuna sothene sa ismu ni itthu sothene sikina. Ti yoonanara! Muluku, amoriwe ikharari! Yesu onimoorwa, apatthani. Khamunrowa okhalana okathi omosa wa

ohiyu, wala nimosa wa mahiku awo. Vanreerela nwehawewe naanaano va.

Nivekele:

⁸⁵ Akavi a nyuwo aniira, “Munna Branham,” ni muru anyu wowuurama, matata anyu oovenxiwa, “mukuupuwelle mmavekeloni mwanyu, Munna Branham. Kinoorwa ohiy’ula, miyo nkiruule va wira kooniwe paahi”? Muluku ooreeriheni. Nkawehani paahi matata. “Miyo nkirwiye va wira kooniwe, miyo kiruule osuwela ethu. Ni kinnaamini wira Muluku oolavula ni murim’aka okathi mwaalaleyaanyu, ni koosuwela wira koovonya. Miyo—miyo kintthuna kikhale muKristu ekeekhai, ooromeleya. Miyo kintthuna kikhale mulipapoophenta ekeekhai, wira okathi onrow’aka w’Apwiya aka ni okokhora ni makutha aka, Kintthuna wira Awo akipatikhe mmoononi mw’Aya, yiire, ‘Oh, namaphenta Aka!’”

⁸⁶ Munnimuupuwela Salomoni, moota owo olavunly’awe yeeyo? Owo ohimmye wira, “Murwe, mphento aka, nrowe neette niviraka mmihokorokhoni, nrowe neette niviraka mmatta mwa soowunkhela.” Moota owo aahimaly’awe wira iyano sawe saakhala ntoko ithutu sa nluwa, ni sikina. Moota owo aamphest’awe mwaar’awe mwaamukhaani, khwira, “Murwe, nirowe namaliherye mphento ahu.”

⁸⁷ Mwaarowaka waltaari wanyu ovekela, murima anyu onkhala wooromeleya ni munepa anyu woohithukumeliheya murima mpakha muniiraanyu, “Pwiya Muluku, nrowe nivahane ophentana wahu,” nto nyuwo muniira, “Ayo, Mulipa-oophenta aka, miyo kinnisiveliwa ni Nyuwo”? Wala, munokhalaka muraruwaka? Munnikhalaka musivelanaka ni olumwenku?

⁸⁸ Nto okathi w’Apwiya ori vakhiviru okathi ithoonyeryo iya sothene ni mitikiniho, ni ikonto miloko sene sa itthu sikina siniiraneya, sithoonyaka, khula esuveliheryo ethoonyaka. Woopacyera oriipela. Wookhala oriirya mukereja. Muhalalalihonkhala ntoko woomala. Eyiiraneyelo yookiserya ehanle omala. Nto va hiyo niniiphwanya mmansihu mooraruwani. Owo onrowa wira exenei? Owo onoorowa onisukhuma ottuli Wawe, ni wira, “Mukhume wa Miyo, nyuwo muniira sootakhala.”

⁸⁹ Vano, aakhan-ene mutthu va aatthuna wuupuweliwa-tho, miyo pooti ovekela minuutu ene yoola, munvenxerye matata Muluku, mwiire, “Vano kinoovahererya ni wira, ni mahala a Muluku, okhuma ohiy’ula mpakha ohoolo miyo kinookhala makhalelo ooromeleya ni mukhaliheryo wa Muluku.” Muluku ooreeriheni. Muluku ooreeriheni. Ni nyuwo munna mulopwana, muthiyana, nyuwo mwamuthiyana, nyuwo mwenye, nyuwo munna, nyuwo va, ohitto iwo, ni nyuwo mmiravo.

⁹⁰ Ookhala mutthu mu ohinatoko woopowa, ni oniira, “Munna Branham, mukuupuwelle miyo, nkinatoko oyariwa vasya. Koosuwela wira nkiyariwe”? Nwiriyane, nyuwo khamo้อนwe

mpakha tuyariwe vasya, nyuwo murukunuwenle Etthu paahi; masi okathi ommukupali anyu Kristu muniyariwa vasya. Nyuwo muniira, "Munna Branham, miyo nkinakupaliki Eyo. Koosuwela wira koovonya. Vano kinnivenxa matata aka, wira, 'Mukuupuwele, nave.' Miyo nkinatoko woopowa. Miyo nkinatoko—hata nkinatoko weehererya omurumeela Kristu, masi kinthuna keehererye. Mukivekele, Munna Branham." Munnitthuna ovenxa ntata, mutthu mu naanaano va? Ookhala mutthu mmosa mu ohinatoko okhala muKristu, aatthuna ovenxa ntata, aire, "Mukuupuwele, munna, mmavekeloni"? Muluku ooreeriheni, mwan'aka. Mutthu mukina-tho oniira, "Mukuupuwele, munna"? Muluku ooreeriheni, muhano. Mutthu mukina-tho, "Mukuupuwele miyo, munna, kinthuna vano kimwaamini Pwiya Yesu ni omukupali Yoowo okhala Moopoli aka"? Muluku ooreeriheni, munna. Ti yooreera.

⁹¹ Ookhala aakuulumenle nihiku nlo, airaka, "Munna Branham, munihimeryani wira, 'Nvenxe ntata'?" Nwiriyane, khaavo mutthu onaamini wiihana waltaari okivikana miyo. Miyo kinnaamini orwa waltaari, ti yooreera, masi eyo kheniwoopolani. Owo muupuwelo anyu, muthanlelo anyu wa Kristu. Nyuwo muniira, "Ahe, miyo kaaronwe-ru mpakha waltaari." Ti yooreera. Masi, axinna, nyuwo munnisuwela wira mwaavenxaka ntata munikurumula khula ekano ya siyensiya ekhanle? Ntata nanyu, mwa ephattu, mwaha wa elemelelo, nihaana okhuruwela vathi. Nyuwo mwavenxa ntata nanyu eyo enooniherya wira ookhala ookhala mmosa a Erimu mwa nyuwo onwerya ovirikanya ikano sa ephattu, wira munvenxerye ntata Mpattuxa anyu, Etthu emosa mmurimani mwanyu ehiira ethanlelo. Muluku onniwoonani nvenxaka siiso ntoko Owo siniwoonaaweni waltaari. Eyo ekeekhaii voolikana. Nyuwo mwahimyaru ni murima, Muluku onnihimya nave. Masi nkawehani, mpathhani, nyuwo khamukhanle okhalaka a nuusu, nyuwo muhaana ohimya yeeyo ni murima.

Vano nrowe nivekele:

⁹² Tithi Oottottopeliwa a Wirimu, ohiy'ula wopaceryani wa muhakalaliho ola, okathi ahu omanlyaaya vano, ni ovira vakhani, kinoovekelani wira Nyuwo mwaamorele ikhariati atthu ala. Ni munivahe, Muluku Oowerya sothene, wira... Va ohiy'ula matata miloko miili mano aavenya mpaani mu, wira annimutthuna Kristu. O Muluku, eyo ti minepa saya. Erooho, Makhura, ahanle ovarela. Khanrowa okhalatho. Okathi nttoittoi nookiserya nimmalaaya mmukhavuni, wala muntonkani, khanrowa-tho okhala Makhura aniheliwa muxamaniyani. Awo annisuwela wira ari nihiku nookiserya. Khuovo nroromelo elapo ya vathi wa hiyo ota wa Kristu. Miyo kinnivekela ohiy'ula, Pwiya, wira mwa enamuna emosa, wa ntittimiho wa okathi ula, ntittimiho, wira Nyuwo vano nveleelihe Erooho Yoowaarya yaavenxinhe matata, ni ewoopole

mwa mwakhalelo a etampi. Munivahe, Tithi.

⁹³ Ni wira muthukuman'ola ohinatthi omala, akhale vekeekhai ituusiya a yaawo, anci-ene ekhuwelaka ni Erooho Yoowaarya. Wira, nipuro nla na opatiisu, ekhale mmosa nuumala mukina oopatisiwa mwa Nsina nooreeraxa na Pwiy'ahu Yesu Kristu, voosiisu wa Paasikha, ehihimuwaka mweekumini ya naanaano. O Tithi Oottottopeliwa Ohinimala, miyo kinvekela wira Nyuwo mwaareerihe. Munivahe, Pwiya. Nto vano, okathi ene yoola, ethanlelo aya ekhale y'ekkekhai, wira awo yookupalini Nyuwo vaava ekilaanthe-ene. Altaari ahu ni mapuro othene t'osareiwa atthu, ni ninvekela wira Nyuwo mwaahiye atthu ala ohiy'ula ekhale arumeyi Anyu. Mwa Nsina na Kristu.

⁹⁴ Nirineene miru suhu soowuurama, kintthuna kookoheni etthu emosa yotttimiheya. Nyuwo nvenxale ntata nanyu ni nyuwo mwaavekela, koosuwela wira khanvenxale ntata wira moone ntata nanyu ovenya paahi. Nyuwo nvenxenrye okhala wira yookhala Etthu yooleenleni. Nto nyuwo mwiire, ni ntata osulu, "Munna Branham, miyo kinnaamini, ohoolo wa Muluku ni opatthana nno, kinnaamini wira ehiiraneya etthu mmurimani mwaka ohiy'ula, wira okhuma ohiyu ula mpakha ohoolo kinrowa okhala mutthu oovirikana." Munnitthuna ovenxa ntata, nyuwo nvenxale ntata, wira, "Miyo kinnaamini"? Muluku oreeriheni, muhano. Muluku ooreeriheni, nyuwo, nyuwo, nyuwo. Eyo ti yoothamaleya. Ottuli wu, ayo, Apwiya yooreeriheni.

⁹⁵ Mutthu mukina-tho onvenxa ntata, wira, "Kinnaamini naanaano va"? Muluku ooreeriheni, munna. "Apwiya annikileela ohiy'ula..." Muluku ooreeriheni, muhano ottuli iwo. Muluku ooreeriheni, mwamuthiyana va. "Apwiya annikileela naanaano va wira ehiiraneya etthu mmurimani mwaka, ni kinnaamini wira kinrowa okhalana ohakalala woowaatta n'ukhuma muhakalalihi ola ovikana sitonko aka okhalana kookhalaru." Muluku ooreeriheni. Vaareera, Muluku ooreeriheni, muhano mukilaanthe va. Miyo kooma wira waari okathi wa nyuwo ovenxa ntata nanyu, nave. Ookhala mukina, oniira, "Kinnoona voovirikana, Munna Branham, kinnaamini wira kinrowa okhuma mukereja mu ohiy'ula ni osuwela wo waattamela wa naanaano wa Kristu. Miyo kinrowa okhuma va kakhaleke makhalelo oovirikana. Miyo kinrowa okhala muKristu, ni mahala a Muluku. Miyo kinnaamini wira Muluku ookiihana"?

⁹⁶ Nto vakhala wira Owo oowiihanani, nyuwo mwa Awawe. Muhiye osivelana, muhiye osivelana n'ulumwenku! Murwe, mmukhalele Yoowo vano. Mwiire, "Kinnittharuwa itampi saka sothene, nto vano kinimukuxa Kristu okhala Moopoli aka." Aamukhala mukina nihinathhi omaliha? Ookhala? Muluku ooreeriheni, munna. Muluku ooreeriheni. Ti yoorera. Muluku ooreeriheni. Ti yooreera. Kinnitteeawa murima vanci-ene owoonani mwiiraka siiso. Vaareera.

⁹⁷ Opacerya wa ohiyu vano, eri vakhani...hiyo khanintthuna ohela ekhittelelo yinci-ene wa yeela, nintthuna nikhumé vahilekenle wira nwerye otthika meelo ohiyu.

⁹⁸ Nihinatthi omaliha, ookhala mutthu onwereiwa ontthuna ovenxa ntata, wira, "Mukivekelele, Munna Branham"? Vaareera, ari matata mathanu, mathanu na mosá, mathanu na maili, mathanu na mararu, mathanu na maxexe, muloko, muloko ni nimosa, muloko ni maili, vaareera, vano muloko ni mararu, muloko ni maxexe, vaareera, muloko ni mathanu.

Nrowe nuurame vano:

⁹⁹ Tithi Oottottopeliwa a Wirimu, Nyuwo muhoona matata awo. Nto, oh, awo ari va mwaha wa niwoko. Khino awo t'aKristu, masi antthuna mukhaliheryo Anyu muulupale. Ni ninnisuwela, Pwiya, wira Nyuwo mwaahikhuwela mwa Davidi, khwira, "Muhiliyale sooreera Saya sothene Yaawo anlevelela soottheka sahu sothene, Yaawo anvoniha iretta sahu sothene." Kinvekela wira Ephome ya Kristu ekhale vooreeraxa mwa yaawo ni avonihewe, wira ettottele muraareló muthukuman'ola onoorwa. Munivahe, Pwiya. Mwa Nsina na Kristu hiyo ninnivekela. Amen.

Nrowe nivenye vano, *Mukuxé Nsina Na Yesu Ni Nyuwo*:

...Nsina na Yesu ni nyuwo,
Mwaanaa...

Nrowe nirukunuwe, nvahane matata ni mutthu ori vakhiviru ni nyuwo. Murukunuwe, nvahane matata.

Nlo nnimoovahani otthapa ni olipa,
Oh, mukuxé Nenlo mapuro othene
onrow'anyu.

Nsina nooreerexa, (Nsina nooreerexa) (O
noosivel!)

Muroromelo wa mulaponi ni ohakalala wa
Wirimu;

Nsina nooreerexa, (Nsina nooreerexa) O
noosivel!

Muroromelo wa mulaponi ni ohakalala wa
Wirimu.

Vano nrowe voomaaleleya, niwehaka epant'ilá, niipe voomaaleleya:

Nsina na Yesu nuurameliwe,
Nikokhoraka munawoni Mwawe,
Mwene a mamwene Wirimu ninoomuwariha
nleha,
Oh, okathi ekwah'ahu enimalaaya.
Nsina nooreerexa, (Noottottopeliwa Nenlo.) O
noosivel!

Muroromelo wa mulaponi ni ohakalala wa
Wirimu;
Nsina nooreerexa, (Nsina nooreerexa!) O
noosivela!
Muroromelo wa mulaponi ni ohakalala wa
Wirimu.

¹⁰⁰ Vano okathi vakhani paahi nuuvira ewoora yaneethanu na xexe, minuutu soophiyaka mithanu na miili wala mithanu na miraru nuuvira ewoora yaneethanu na xexe. Voohipisa, munoowerya ophiya owaani, mutthike meelo ohiyu ni ninoopuha iparakha sa Muluku, opuha okhala wanyu vaava. Nto vano miyo kooweha oophiyaka matata muloko ni maili, muloko ni maxexe wira evonihewe ohiy'ula. Yatthikela wira ekhale atthu anci-ene aretta, ninrowa wiihana ohiyu umosa paahi wa muthukumano wa muteko w'ovoniha, khino Saapatu ohiyu ni Ttiminku. Noona wira khaninwerya waakuxa othene awo Ttiminku, ninrowa waakuxa Saapatu ohiyu. Nnimoona moota enrowaaya okhala.

¹⁰¹ Vano miyo—miyo kinvekela wira iparakha sa Muluku sikhale voowiixerya mwa khula mmosa a nyuwo, ni wira Owo akhale ni nyuwo ni oooreeriheni mpakha nikumane-tho meelo ohiyu.

¹⁰² Nrowe nuuramihe miru sahu vano okathi vakhani paahi wa mavekelo, kinvekelaka pastore orwa va ni olaxerya mwa nuulumo na mavekelo. 

**57-0417 Orwa Waneeili Wa Apwiya
Branham Tabernacle
Jeffersonville, Indiana wAmerika**

EMAKHUWA

©2023 VGR, ALL RIGHTS RESERVED

**VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org**

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa ethu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumiheweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthunikeriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhanle, xontte mulavule ni:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org